



Sesida dals

19 d'avrigl 2021

Communitgà ils

23 d'avrigl 2021

Protocol nr.

350/2021

Incumbensa Widmer (Favugn)

concernent la creaziun d'in concept chantunal general per mesiras preventivas
cunter il littering en il chantun Grischun

Resposta da la Regenza

En il chantun Grischun è il littering oravant tut in problem per la sanadad dals animals sco er in problem estetic. Periclitads èn en spezial animals da niz ed – en ina dimensiun restrenschiada – animals selvadis, sch'els maglian il rument bittà davent, daventan malsauns da quai e crappan pervia da quai. Ultra da quai pon ils excrements da chaun smerdar l'erva u arrivar en il pavel cun la consequenza ch'i dat in dumber pli grond d'aborts infectus chaschunads da parasits. L'ambient è pertutgà dal littering en spezial en quel senn che las substanzas dal rument na pon betg vegnir recicladas, perquai ch'el vegn bittà davent e chaschuna in dischurden en la cuntrada. Consequenzas ecologicas directas per il terren e per las auas na datti strusch u resultan mo punctualmain, uschia che quellas èn fitg limitadas. Da princip è il littering in tema che concerna la "schubradad" dal spazi public. Pervia da quai sto el vegnir prendì per mauns en emprima lingia or d'ina perspectiva "sociala".

Tar il punct 1: En il rom da la petiziun 3 da la sessiun dals giuvenils dal Grischun 2019 è gia vegnì giuditgà qualitativamain il stadi actual areguard il littering en il chantun. Da l'enquista ch'è vegnida fatga da quel temp tar las vischnancas grischunas pli grondas e d'in giudicament dals uffizis chantunals resorta ch'il littering sa mussa bain en tsherts lieus e durant tsherts temps, ma ch'el n'è per la gronda part da las autoritads interrogadas betg in problem acut che stuess vegnir prendì per mauns cun prioritad. Unicamain en l'agricultura datti in basegn d'agir pli grond per cumbatter cunter il littering, perquai che ruments sco dosas u staglias da vaider èn in privel per ils animals da niz, en spezial, sch'els pasculeschan sin pastgiras per lung da vias. Per part vegnan ils ruments manizzads da las maschinas da segar ed alura magliads dals animals da niz. Per pudair giuditgar meglier e pli detagliadamain il stadi actual dal problem dal littering en il chantun, èsi necessari ed util da far ulteriurs scleriments.

Tar il punct 2: La sensibilisaziun da la populaziun concernent il consum da resursas e concernent la mentalitad da bittar davent po p.ex. vegnir fatga en las scolas. En

quest connex ha la Regenza gia incumbensà l'Uffizi per la natira e l'ambient e la Scola auta da pedagogia dal Grischun (SAPGR) d'examinar pussaivladads adattadas. Actualmain vegn elavurada ina skizza da project per installar in post spezialisà per l'educaziun ambientala en la SAPGR. Cun quest post e cun ina purschida da furnaziun supplementara respectiva per las persunas d'instrucziun poi vegnir tegnì quint en moda adeguata da l'infurmaziun sistematica resp. da la prevenziun concernent la problematica dal littering. Ils resultats da l'enquista online planisada pon vegnir integrads.

Tar il punct 3: Sin plaun chantunal exista gia – cun l'art. 36h da la Lescha da polizia dal chantun Grischun (LPol; DG 613.000) en cumbinaziun cun l'art. 36a al. 1 lit. c da l'Ordinaziun da polizia (OPol; DG 613.100) – ina basa legala per chastiar il littering cun 100 francs en la procedura da multas disciplinaras. Sin fundament da l'art. 36k LPol è la persecuziun penala da princip chausa da las vischnancas. Sche la procedura da multas disciplinaras na po betg vegnir applitgada, vegn applitgada la procedura penala ordinaria (art. 3 da la Lescha introductiva tar il Cudesch da procedura penala svizzer [LItCPP; DG 350.100]).

Tar il punct 4: Il basegn per in concept chantunal unitar per prevegnir al littering n'è – considerond il stadi actual da las enconuschientschas – betg avant maun. Il littering e sias consequenzas pon vegnir cumbattids efficaciamain sin trais axes d'agir: cun in'educaziun ambientala solida e bain fundada, cun realisar sistematicain mesiras per proteger ils animals da niz e cun engaschar rangeras e rangers che patruglieschan en territoris sensibels e che tschertgan il dialog cun las persunas che pudesan eventualmain chaschunar in littering. Questas axes d'agir vegnan realisadas gia oz.

Sa basond sin questas explicaziuns propona la Regenza al Cussegl grond da midar questa incumbensa areguard il punct 1 sco suonda: far in'enquista online tar las vischnancas e tar las puras ed ils purs concernent la problematica dal littering, ed areguard il punct 2 sco suonda: mussar – en il rom dal project "Post spezialisà per l'educaziun ambientala SAPGR" – mesiras d'infurmaziun e da prevenziun concernent la problematica dal littering, e da la refusar areguard ils puncts 3 e 4.



En num da la Regenza

Il president:

Dr. Mario Cavigelli

Il chancelier:

Daniel Spadin